



Komunikadu Imprensa
08 Marsu 2022

Timor Leste comemora Loron Internasionál ba Feto: Igualdade Jéneru no mudansa klimátika

Iha 8 Marsu 2022, kada tinan Timor-Leste sempre comemora Loron Internasioál ba Feto hodi fó rekoñesimentu ba kontribuisaun feto Timor-Leste no mos feto sira iha rai seluk.

Selebrasaun ba tinan ida ne'e, konsagra ho tema "Igualdade jéneru loron-ohin ba loron-aban ida ne'ebé sustentável," iha ne'ebé rekoñese papél importante Feto nian hodi hasoru dezafiu boot sira iha prosesu dezenvolvimentu nasional nian. Dezafiu sira hanesan mudansa klimátika ne'ebé sai gráve bele hamosu dezastre natural no kalamidade iha país ne'e.

"JSMP fiar katak ho tema ne'e sei enkoraza liu tan governu liuliu ba ministériu relevante sira hodi esforsu no asegura ema hotu nia kondisaun moris di'ak liu iha situaun mudansa klimátika ne'ebé fó impaktu boot tebes ba comunidade sira liu-liu ba feto no labarik", dehan Sra. Ana Paula Marçal, Diretora Ezekutiva JSMP.

Ho tema nasional ba tinan ida ne'e fó hanoin filafali ita hotu ba akontesimentu iha tinan kotuk ne'ebé rezulta maluk barak tenke lakon sira nia hela fatin no tenke hela iha fatin refujiadu ho kondisaun ne'ebé mak ladi'ak liuliu feto no labarik sira, ate iha kampu refujiadu balu to'o akontese kazu abuzu seksuál ba menór. Ho situaun ne'e dada ema hotu nia atensaun. Tanba bainhira akontese dezastre ruma liga ho mudansa klimatika fó impaktu maka'as liu ba feto no labarik sira.

Feto sira iha área rurais no mós iha sidade presiza sai parte husi prosesu foti desizaun liga ho asuntu ambientál no dezenvolvimentu nasional. Ho nune'e ita nafatin kuidadu no asegura katak jersaun oin labele sofre ho rezultadu negativu sira ne'ebé kauza husi asaun no implementasaun sira ne'ebé la konsidera sustentabilidade husi ita nia ambiente.

Dezafiu sira ne'ebé sai hanesan obstákulu loloos hodi fó risku ba implementasaun di'ak hosi polítika sira ne'ebé sensível ba kestaun jéneru no mitigasaun vulnerabilidade nian, hanesan halakon ki'ak, kombate subnutrisaun no asesu ba serbisu báziku importante sira hanesan saúde, edukasaun, hela-fatin ka seguransa sosiál, no seluk-seluk tan. Iha

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

dezafiu sira ne'e hotu, konta ho feto sira hanesan ajente transformasaun no mudansa iha familia, eskola, iha serbisu-fatin, empreza no comunidade.

Liuhusi JSMP nia observasaun iha terenu no liuliu ba feto maluk sira ne'ebé sofre husi mudansa klimátika hatudu katak feto barak mak lakon oportunidade ba partisipasaun públiku no mós lakon sira nia material ne'ebé importante tebes ba sira nia vida moris lor loron, alende ne'e JSMP mós nota katak husi mudansa klimátika ida ne'e fó impaktu boot tebes ba labarik sira hodi asesu ba edukasaun no mós ba fatin sira ne'ebé seguru.

Ba komemorasaun loron importante ne'e, JSMP kongratula feto hotu iha mundu liuliu feto Timor- Leste ne'ebé mak sakrifika sira-nia an hodi proteje feto nia direitu no lori mudansa signifkante ba jersaun foun nia moris.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl